



Cuschina alpina en hotels alpins

Il cudesch da cuschinar «Alpenküche» è in cudesch da menus ch'unschida tradiziun e moderna.

5



Telecabina nova a Curvalda

Lai Pendicularas SA han investà 20 milliuns en ina nova telecabina a Curvalda.

9

südostschweiz

LA QUOTIDIANA

Redacziun: Via Sommerau 32, 7007 Cuirra, tel. 081 255 57 10, redacziun@laquotidiana.ch

Roger de Weck: «Era RTR sto spargnar»

DA MARTIN CABALZAR

■ Dapi tschintg onns diregia Roger de Weck l'interpresa SRG SSR sco directur general. En in discurs cun La Quotidiana è el s'exprimi davart l'incumbenza da la SSR en in mund medial che sa mida a moda rasanta. Sco quai che Roger de Weck di è la Svizra rumantscha ina part essenziala ed integrala da la SSR. En connex cun las mesiras da spargn sto SSR stritgar var 250 piazzas. Bain sa-

jan tar RTR naginas piazzas pertugadas, RTR stoppia dentant reducir l'offerta dal program. Tar Radio Rumantsch tutgia quai l'emissiu da musica «Chant au tour», la radionovella «Vita capita» ed il «Radio Maraton triling» a partir da 2017.

Tenor Roger de Weck ston las chasas da medias svizras cooperar dapli per daventar pli cumpetitivs vers las purschidas da google e facebook.

> PAGINA 2

8000 tiraduras e tiradurs

La Surselva candidescha per la Fiasta da tir cantunala 2018

DA GIUSEP VENZIN / ANR

■ Ils delegai dall'Uniuon grischuna dil sport da tir seradunan ils 5 da mars 2016 a Valenda. Cun quella caschun vegn il District da tir Surselva cul president Hans Stucki a presentar ina candidatura pil tir cantunala 2018. Las empremas contractivas cullas societads da tir dalla Surselva han giu liug, era igl um che surpren il tgamun dil comite d'organisaziun ei anflaus ella persuna da Marcus Caduff. Il deputat da Morissen ch'ei il president da Surselva Turissem ha puntau: «In tir cantunala 2018 en Surselva fuss turisticein, economicamein e social in punct culminont.»

Il davos tir cantunala el Grischun ha giu liug il 2012 el Grischun central. Carl Frischknecht da Tumegl ha presidiu il comite d'organisaziun dalla fiasta cun varga 9000 tiraduras e tiradurs. Dacuort eis el staus a Glion ed ha dau plaid e fatg dalla fiasta organisada ella Tumliasca, en Surses, Valrein ed Alvra tochen a Tavau. Il commember d'honor dall'Uniuon grischuna dil sport da tir ha cussegliu d'entscheiver imme-



Alla Fiasta da tir cantunala quantan ils organisaturs cun 8000 tiraduras e tiradurs.

FOTO G. VENZIN

diat culla lavur. Oravontut la tscherca dils sponsurs principals hagi prioritad ell'emprema fasa. El ha numnu in preventiv da varga dus milliuns francs. Sco

Marcus Caduff ha orientau spetga el sin fundament dallas empremas retschercas cun rodund 8000 tiraduras e tiradurs la stad 2018 ed ha aschuntau: «Ussa

drovi in tschuat funcziunaris e bia curascha e lu vesein nus ils 5 da mars sch'els delegai dall'uniuon grischuna acceptan la candidatura.»



Il president dal cussagl administrativ Jon Peer tanter il cusglie administrativ Paul Häring (sch.) e l'assessor Gerhard Pfister.

FOTO F. ANDRY

Institut Otalpin rinforza il marketing

■ (anr/fa) Cun optimar il marketing speran ils responsabls da l'IOF da pudair acquirir dapli scolars in Svizra ed eir utro. I's vuol però eir examinar cooperaziuns pussiblas illa regiun o a Tavo. In sonda a chaschun da la 101avla radunanza generala da l'Institut Otalpin Ftan SA (IOF) ha preschantà il cussagl administrativ sia nouva strategia. Quella es gnüda elavu-

rada daspö l'avuost passà. Sco cha Stefan Prebil, il CEO da la scoula media a Ftan, ha explicà prevezza la Strategia 2020 d'optimar la sporta da l'IOF in trais fasas. Tanter oter as lessa introduer eir il «International Bacculaureate», la matura internaziunala chi vain arcugnuschüda in tuot l'Europa ed eir utro.

> PAGINA 7

Val Müstair retschaiva ulteriurs fùgitivs

■ (anr/fa) S-chars 300 persunas han tut part d'incuort a Sta. Maria a la saira d'infurmaziun cul tema fùgitivs in Val Müstair. Arno Lamprecht, il capo dal cumün da Val Müstair, es satisfat da la saira. «Id es statta üna buna saira, cun fich bleras dumondas criticas, impustüt eir in vers il chantun», disch Lamprecht ill'intervista cun l'anr. Per respuonder las dumondas da las

abitantas e dals abitants da la Val Müstair d'eira preschaint eir Georg Carl da l'Uffizi chantunala da migraziun. D'incuort sun rivats ed han tut alloggi a Valchava ils prüms 14 dad üna tschinquantina da fùgitivs. Il capo Lamprecht declera che cha 50 fùgitivs significhan per l'economia da la Val Müstair.

> PAGINA 7

Lectura per las scolas

■ (anr/gv) «Igl ei impurtont dad haver avunda e bunas lecturas», ha la scolasta secundara Carin Cadruvi da Ruschein detg en ina intervista cun l'anr. Ella ha accumulignau las duas scribentas lumnezianas Flurina Albin e Stina Hendry tier lur ovra «Emalio». Las duas giuvnas che han scret igl emprem cudisch da fantasy en romontsch sursilvan han presentau la sonda lur ovra en ina vernissascha a Vella. Cun 13 onns han ellas entschiet a scriver il cudisch el rom d'in project da scola. Cun scriver l'ovra fantastica hagi la figura principala «Emalio» fatg in svilup, denton era las duas auturas, conceda la scolasta Carin Cadruvi.

Il cudisch da Stina Hendry e Flurina Albin ei sin buna via da daventar in bestseller romontsch. Aposta pil cudisch datti ina pagina d'internet www.emalio.ch ed in link tier facebook.

Denter auter san lecturas e lecturs exprimer leu il meini dil cudisch. Il cudisch ei venals ellas librerias ed ellas stizuns dil Volg en Lumnezia cuosta 29 francs.

100 vischins han suttascret

Remo Stoffel duei restituir sis milliuns francs

■ (anr/gv) A caschun dalla radunanza communal il venderdis vargou han vischins surdau alla suprastanza dalla vischnaunca da Val ina iniziativa culla pretensiun ch'igl investur Remo Stoffel restitueschi immediat ils sis milliuns francs pendents per la cumpra dil Hotel Terma. Per la cumpra da quei ho-

tel havess l'interpresa Priora digl investur indigen duiu pagar diesch milliuns francs. Tenor il contract ha la vischnaunca concediu in termin da pagar tochen la fin dil mars vargou. Ils iniziants pretendan il pagament dils sis milliuns tochen la fin da quest meins e vitier il tscheins da 200 000 francs. La vischnaunca ha decla-

rau d'esser activa en causa. Ella hagi prolungiu il termin da pagar. Tenor ils iniziants ei la decisiun da prolungir il termin buc acceptabla. Las rodund tschien persunas che han suttascret l'iniziativa giavischien fatgs e buc adina novas empermischuns.

> PAGINA 3



La vischnaunca da Val ha aunc dabien sis milliuns per la vendita dil Hotel Terma a Remo Stoffel.

MAD



Servetsch d'abunents e da distribuziun: tel. 0844 226 226 mail: abo@somedia.ch